



PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

ANG Paghimakas

GINAUBAYAN SANG MARXISMO-LENINISMO-MAOISMO DISYEMBRE 2022

Atubangon ang masingki kag sustinido nga atake sang kaaway! Magpakuripot sang aton agtang agud matinugahon nga masulong ang inaway banwa!

*Komiteng Rehiyunal sa Partido sa Isla sa Negros
Disyembre 26, 2022*



SA MAKASAYSAYAN NGA OKASYON SA pagsaulog sang ika-54 nga anibersaryo sang liwat nga pagkatukod sang Partido Komunista sa Pilipinas (PKP), kami, ang Komiteng Rehiyunal sa Partido sa Isla sa Negros (KRPIN), nagahatag sang amon mapula nga saludo sa tanan nga kadre kag katapu sang Partido sa isla, tanan nga Pulang kumander kag hangaway sang *Apolinario Gatmaitan Command-New People's Army Regional Operational Command (AGC-NPA)*, tanan nga alyadong pwersa sang *National Democratic Front of the Philippines (NDFP)* sa Negros, kag tanan nga mga progresibo kag patriyotiko nga Negrosanon nga, sa sini nga tuig, nakig-away kag nagmadinalag-on sa pagpangibabaw sa wala untat, dalagku kag mapintas nga kontrarebolusyonaryo nga kampanya nga ginpasa halin kay Rodrigo Duterte nga pasistang tiraniya sa idalum ni Ferdinand Marcos Jr.



Amon ginahalad ang pinakamataas nga rebolusyonaryo nga pagpasidungog sa kay Kaupod Jose Maria Sison (Amado Guerrero), aton dungganon nga lider komunista kag iwag nga ubay sang mga Pilipino nga proletaryong rebolusyonaryo, nga nagtaliwan pila ka adlaw antes sang subong nga pagsaulog. Sa iya kamatayon, aton liwat nga pabakuron ang panindugan nga ipadayon sa mas mataas nga halintang ang Rebolusyon Pilipino nga iya ginsuguran 54 ka tuig na ang nagligad kaupod sa pila ka kadre gikan sa masang organisasyon sang mamumugon, mangunguma kag pamatan-on.


Amon man ginabayaw ang amon inumol sa kay Kaupod Romeo Nanta (Ka Juanito Magbanua), Kaupod Ericson Acosta kag tanan nga rebolusyonaryo nga nag-alagad sa pumuluyo sa tanan nga posible nga pamaagi hasta nga wala sang kaluoy nga ginpamatay sila sang mga tala-wan nga reaksyunaryo nga mga soldado. Kami lubos nga naga-

pasalamat sa tanan nga mga rebolusyonaryong martir kag baganihan sa ila indi makinagalingon nga serbisyo sa pumuluyo kag sa rebolusyon.

Sa sini nga tuig, naka-angkon kita sang mga kadalagan sa aton rebolusyonaryong hilikuton bisan pa sa mga kasaypanan kag kakulangan. Ang masang Negrosanon grabe ang pag-antus samtang ang kaaway pursigido nga dugmukon ang rebolusyonaryo nga kahublagan sa isla. Ang masunod nga tuig importante nga higayon kon sa diin aton sampaton nga anguton ang rebolusyonaryong teorya kag praktika, madalum nga magtuon gikan sa mga pagtulun-an nga ginhapag sa aton 25-ka-tuig nga pagsuma, pabakuron ang paghili-usa sang Partido sa paghiwat sang pagsaway kag pagsaway sa kaugalingon, kag ipabilin ang hugot nga angot sa masa agud se-gurohon nga malutos ang kaaway kag lab-uton ang rebolusyonaryong kadalagan.

Amon ginahalad ang pinakamataas nga rebolusyonaryo nga pagpasidungog sa kay Kaupod Jose Maria Sison (Amado Guerrero), aton dungganon nga lider komunista kag iwag nga ubay sang mga Pilipino nga proletaryong rebolusyonaryo, nga nagtaliwan pila ka adlaw antes sang subong nga pagsaulog. Sa iya kamatayon, aton liwat nga pabakuron ang panindugan nga ipadayon sa mas mataas nga halintang ang Rebolusyon Pilipino nga iya ginsuguran 54 ka tuig na ang nagligad kaupod sa pila ka kadre gikan sa masang organisasyon sang mamumugon, mangunguma kag pamatan-on.

DISYEMBRE 2022



ANG Paghimakas

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.



angpaghimakas@protonmail.com



negrosrevportal.wordpress.com

I. Grabe ang pag-antus sang mga Negrosanon sa idalum sang subong nga rehimen US-Marcos

DAKU ANG NABENEPISYO GIKAN SA alyansa kay Rodrigo Duterte, nakuha ni Ferdinand Marcos Jr ang poder sang reaksyunaryo nga rehimen paagi sa madayaon nga kadalag-an. Pagkatapos gid sa pagpanumpa niya sa poder, nagpadayaw si Marcos Jr sang iya gahum sa mga *sugar barons* paagi sa paggamo sang *Sugar Regulatory Administration* (SRA) gamit ang indi awtorisado nga pag-import sang kalamay kag pagpapungko sang iya alipores sa *sugar bloc*. Bilang tampad nga ido-ido sang imperyalismong US, iya gintuman ang mga *neoliberal* nga mga dikta sini nga pag-import sang kalamay nga naghawan sa ismagling, kag pagmanipula sang suplay kag presyo. Ang iya kontrol sa industriya sang kalamay nagakahulugan sang tuman nga krisis pareho sang iya dikta-dor nga amay nga nagtuga sang kagutuman sa isla kag nagpamuno sang klima sang kahadlok nga nagresulta sa masaker sa Escalante sang 1985.

Ang mga dalagku nga kumprador-agalon mayduta nga naga-monopolisa sang linibo ka ektarya nga plantasyon sang tubo kag nagapanag-iyang sang mayoriya nga bahin sa mga sentrales kag babiligyaanay sang kalamay sa isla madasig nga naka-adoptar sa krisis sa kalamay nga gintuga sang pagginahum ni Marcos Jr. Kon magnubo ang ganansya gikan sa produksyon sang kalamay, ila ginabag-o ang bahin sang ila plantasyon sang tubo sa indi produktibo nga gamit pareho sang *solar fields*, komersyal kag eko-turismo kag *real estate* ukon ginabalhin sa iban nga *high-yielding* nga mga komersyal nga pananom santo sa demanda sang pangkalibutanon nga merkado.

Ini bentaha sang dumuluong kag lokal nga mga *speculators* kag multinasyunal nga kumpanya nga nagbase-sa-duta nga nagalaway nga maka-agaw sang malapad nga kadutaan kag mangkurakot sang dunang manggad sang Negros.

Ang mga masa sa Negros, masami mga imol nga mangu-nguma kag mamumugon sa kampo upod na ang pila ka tribo sang tumandok, padayon nga nagaantus sang indi maagwanta nga pagpanghimulos kag pagpamigos nga nagapaantus sa ila sa sobra na isa ka siglo. Apang ang mga mamumugon sa kampo amu ang mas grabe nga ginulipon sa balik-balik nga sikulo sang barato nga kusog pangabudlay sa panahon sang galing kag kagutuman sa binulan sang tiempo muerto (panahon sang sira galing). Ang mamumugon sa kalamay sa isla, sa plantasyon man sang tubo ukon sentral, nga naga-isisip sang 330,000 kag 150,000, naga-antus sang makuulipon nga kundisyon kag nagabaton sang barato nga sweldo. Mayoriya wala sang bisan ano man nga benepisyo.

Naglab-ot sa P410 ang subong nga *minimum* nga sweldo sang

mamumugon sa agrikultura sa Negros Occidental kag P382-392 sa Negros Oriental; maathag nga manubo sa tunga sang P1,119 nga makabuhi nga sweldo nga kinahanglanon sang isa ka pamilya nga may lima ka katapuan agud makapangabuhi sang desente. Ang mas grabe pa amu nga ang mga haciendero wala gid nagapatuman bisan san-o man sang *minimum* nga sweldo sa mga hacienda kag ginabarat pa ang makatarunganon nga benepisyo sang mga mamumugon sa kampo. Ang mataas nga bili sang sandigan nga kinahanglanon, lakip na ang kalamay, tuman ka layo sa sweldo nga ginabaton sang mamumugon sa kampo nga nagabaton lang sang P250.00 kada adlaw. Sa pihak nga bahin, duha sa tatlo ka mamumugon sa sentral nagatrabaho bilang mga kontraktwal nga mamumugon.

Ang mga gagmay nga plantador nga wala sang suporta sang gobyerno, nagatubang sang kabudlayan sa paglagas sa mataas nga bili sa pagtanum sang tubo, pareho sang tuman ka taas nga bili sang mga ginagamit sa katubohan (ang maayo nga kalidad nga abono



subong nagabili sang mga P3,000 kada sako), kag nagapangabuhi sa lain-lain nga iskema sang pagpang-agaw sang kadutaan kag usura sang mga daan kag bag-ong tipo nga mga agalon mayduta. Naga-atubang sila sa pamahog nga madula ang ila kadutaan kag nagakapwersa nga ibaligya ang ila kusog pangabudlay. Sa katapusan, kadam-an sa ila nangin lubos panahon nga mamumugon sa kampo.

Magluwas sa produksyon sang tubo, ang mga mamumugon sa kampo kag mangunguma nga wala sang duta ukon wala sang nagakaigo nga duta nga nagprodukto sang humay, mais, saging, lubi kag iban nga tanum naga-antus man sang lain-lain nga porma sang pyudal kag mala-pyudal nga paghimulos.

Yadtong yara sa urbanisado nga syudad, sentrong banwa kag higad baybay sa isla nagakalamang man tungod sa madasig nga paglala sang ila kahimtangan tuga sang rehimen US-Marcos II. Ang mga mamumugon, imol nga taga-syudad, mala-proletaryado, mangingisda, pamatan-on, propesyunal kag iban pa nga sektor naga-antus sang manubo nga sweldo, madamuan nga pagpangtaktak sa trabaho, lapnagon nga kawad-on sang trabaho, nagasirit nga presyo sang sandigan nga mga kinahanglanon, kag pagpribatista sang pampubliko nga serbisyo. Yara man ang kombersyon sang duta kag reklamasyon nga nagpalala sang pagpang-agaw sang kadutaan, demolisyon kag pagpangwasak sang palibot.

Ang katawhan sa Negros, pareho sa bug-os nga katawhan Pilipino, nagaantus man sa atake *neoliberal* tuga sang rehimen Marcos Jr. Sila nagaprotesta sa nagataas nga bili sang langis, pag-import sang agrikultural nga produkto kag ang pagsulod sang dalagku nga kumpanya sang mina.

Ginapamatukan nila ang pag-monoployo sa duta sang hakugan nga dalagku nga kumprador-agalon mayduta nga nakabase sa Negros nga nagatuga sang grabe nga kagutuman kag kaimolon masami sa mga anakbalhas nga masa apang naga-apekto man sa mga nahanunga nga sahi.

Apang ang pamilya Marcos ginagamit ang manggad sang pungsod agud konsolidahon ang ila manggad kag maghugakom pa sang sobra, kag mas pa nga pabaskugon ang ila uyat sa pulitika. Ang Marcos-Duterte nga hubon nagahiusa sa kontra-rebolusyon kag pagka-papet sa imperyalismong US, apang ining ila mahuyang nga alyansa nagapakita na sang biak. Ang kada kampo nagapaindisanay sa ila makawkaw kag impluwensiya nga nagaresulta sa mas pa nga paggrabe sang sitwasyon pulitika sa pungsod.

Ang paghimakas sang katawhan batuk sa imperyalismo, pyudalismo kag burukrata kapitalismo mas nga nagasingki. Sila nagahimakas para sa makatarungan nga sweldo kag benepisyo, para sa duta nga ulomhan, para sa masarangan nga serbisyo sosyal pareho sang edukasyon, ikaayong lawas kag pabalay, para sa pungsodnon nga soberanya, kag nagademanda nga pasabton ang rehimen sa iya korapsyon kag pagkapapet. Desperado nga pahipuson ining malaparan nga pagpamatuk, ang Marcos-Duterte nga hubon naggamit sang terorismo sang estado nga nagagamit sang bayolensya kag pagpaniplang. Iya ginbuhian ang iya ido-buang nga armadong kusog batuk sa katawhan nga nagresulta sa makasiligni kag bayolente nga atake militar ilabi na sa mga komunidad sang mangunguma sa Negros. Ang *Memorandum Order* 32 ni Rodrigo Duterte naglatag sang dalan para sa *de facto martial law* kag

lapnagon nga paglapas sang tawhanon nga kinamatarung.

Ang mga abuso sa tawhanon nga kinamatarung athag nga nagsaka sa 300%. Gikan sa 44 ka nadokumento nga kaso sa katapusan nga anum ka bulan sang rehimen ni Duterte, nagsaka ini sa 178 humalin sang Hulyo hasta Disyembre 2022, sa pagsugod sang pagginahum ni Marcos Jr. Sa 222 ka insidente sini nga tuig nga naga-imbolbar sa sobra 19,000 ka mga biktima, 17 ka kaso ang direkta nga imbolbado ang mga kabataan. Ini nga mga abuso nga ginhimo sang pwersa sang estado kag ila paramilitar ilabi na sa mga *focused military operations* (FMO) nabantayan sa 73 ka barangay sa 19 ka banwa kag syudad sa isla sang Negros. Sentro sang pagpanglapas sa tawhanon nga kinamatarung ang syudad sang Himamaylan sa Negros Occidental kag syudad sang Guihulngan sa Negros Oriental.

Kadam-an sa mga kaso, ang mga elemento sang *Philippine Army* dululungan nga pilit nagasulod sa mga balay sang mga mangunguma kag nagapamahog kag naga-haras sa mga inosente nga mangunguma nga ila ginakusahan nga mga katapu sang NPA ukon tigsuporta. Ini nga mga reaksyunaryo nga mga suldado, kahimbong ang PNP, ilegal nga nagapang-aresto ukon ginadakop ang mga sibilyan kag ginapaidalum sa interogasyon, pagpangsakit, kag mental nga pagpangtorturyur. Ila ginapwersa ang mga sibilyan nga mag-surrender bilang katapu kag tigsuporta sang NPA, kag ginakolekta ang ginpromisa nga bulig gikan sa E-CLIP.

Ang patarasak nga pagpangbomba mas nga nagpakita sang indi mapulong nga epekto nga teror sa estado sa mga Negrosanon. Ang *martial law* sa syudad sang Himamaylan sining



Oktubre 2022 naka-apekto sa 18,000 ka indibidwal. Ang mga pagpangbomba nakawasak sang mga ulumhan, kampo sang tubo kag subong man sa palibot.

Ang pagpamatay sa mga mangunguma nga ginatabunan bilang armadong engkwentro naandan nga modus ukon pamaagi sang mga barbaro nga militar. Nagsaka ang kaso sa hayagan nga pagpamatay sang mga nadakpan nga mga rebolusyonaryo nga wala na sang ikasarang nga makig-away (*hors de combat*) sandig sa “*take no prisoners*” nga polisiya sa kontra-insurhensya nga

kampanya sang AFP. Ang AFP kag PNP mismo nagapaindisanay nga makuha ang patong-sa-ulo sang mga rebolusyonaryo. Daku ini nga tuburan sang ila korapsyon.

Lapnagon ang *redtagging* sa isla nga nagatuyo nga pahupaon ang mga aktibista kag mga nagapamatuk sa pagginahum ni Marcos Jr. Ang nagasingki nga banggianay sa paghimakas sa duta nagahimo sa mga lider mangunguma nga mayor nga target sang kampanya sang *redtagging* kag pagpakamalaut sang pwersa sang estado kag iya makinarya sa pagpaniplang.

Ang pinakagrabe nga atake sa ligal nga demokratikong kahublagan sa Negros sining tuig amu ang pwersa nga pagkadula sang lider sang imol nga tagasyudad nga si Iver Larit sang Abril.

Ang mga kaso sang paglapas sa tawhanon nga kinamatarung sa Negros tagalumapaw na apang may yara pa madamu nga wala mabantala nga mga insidente nga wala nakalab-ot sa midya kag tigdampig sang tawhanon nga kinamatarung.

Gikan sa uhaw sa dugo, brutalidad kag tiraniya sang rehimen Duterte, nagpatilaw sang tatak sang terorismo sang estado ni Marcos Jr sa ikaduha nga tunga sa tuig sang 2022 nga nagpasaka sa kasingkion kag kapintas sang AFP sa kontra-rebolusyonaryo nga gyera sa Negros sa pinasahi nga lebel. Apang ang rebolusyonaryong kahublagan nakatigayon nga makapangibabaw sining hayagan kag mapintas nga atake batuk sa iya hanay kag sa katawhan sa Negros paagi sa ubay kag pagpamuno sang CPP.

II. Ang Rebolusyonaryong Kahublagan sa Negros nga ginapamunuan sang KRPIN ginsumpong kag ginpaslaw ang mga atake sang kaaway

ANG PKP, PAAGI SA KRPIN, nagapamuno sa rebolusyonaryong kahublagan sa Isla sang Negros. Bilang teoritikal nga giya ang Marxismo-Leninismo-Maoismo, kita nagatinguha nga i-aplikar ang rebolusyonaryong teorya sa konkreto nga kahimtangan sang isla kag ginapataas ang aton rebolusyonaryong praktika. Kita nagatinguha nga hangpon, tun-an kag solbaron ang aton subong nga mga problema sa aton rebolusyonaryong hilikuton. Apang ang mas pa nga desaysibo amu

ang pagtransporma sang husto nga ideya pakadto sa rebolusyonaryong praktika.

Ang nagligad nga pagsuma sang rebolusyonaryo nga inagihan sang KRPIN gikan sa temprano nga bahin sang 1990 hasta sa subong nga katuigan husto nga nagtumbok sang ideolohikal, pulitikal kag organisasyunal nga kabaskugan kag kahuyangan sang proletaryado nga rebolusyonaryong pagpamuno sa rehiyon. Nagapabilin ini nga giya kag punto sa paghiliusa sang mga

kadre kag katapu sang Partido agud magtukod sa aton kabaskugan kag tadlungon ang aton mga kasaypanan kag kahuyangan. Gani, naagum ang madalum nga kolektibong paghiliusa kag epektibo nga pagpatuman sang rebolusyonaryong hilikuton.

Sa pagpa-uswag sang madalum nga bubon sang kadre sang Partido nga makasarang nga magpatuman sang madamu nga hilikuton sa rebolusyon, kita naghiwat sang tatlo kag lebel nga pagtuon sang kurso sang

Partido sa lain-lain nga prenteng gerilya kag puti nga purok bisan pa sa wala sang puas nga operasyon militar. Nagmadinalagon kita sang pagsulong sa pagtapos sang tatlo ka hugna sang abante nga kurso sang Partido sini nga tuig. Nagpadayon kita sa aton pagtinguha sa paghatag sang edukasyon sang Partido kag kursong PADEPA, lakip na ang Ang Bayan, Ang Paghimakas kag Ispading, sa masang katapuan sang Partido kag sa mga rebolusyonaryong pwersa.

Ang PKP absoluto nga nagapamuno sa NPA sa paghimakas para sa pungsodnon demokratikong rebolusyon nga may sosyalistang perspektiba. Ining rebolusyonaryong gyera isa ka antagonistiko nga pamaagi agud solbaron ang banggi-anay sa tunga sang ginahimuslan kag ginapigos nga mga mamumugon, mangunguma kag iban nga sahi batuk sa dalagku nga kumprador-agalon mayduta, dalagku nga burukrata kag ila agalon nga imperyalista. Ang kasaysayan nagatudlo sa aton nga ang pagpanghimulos indi madula sa iya lang kaugalingon, kinahanglanon ang isa ka demokratiko nga rebolusyonaryo nga kahublagan sang katawhan agud dulaon ini.

Ang Partido, ang NPA, ang re-

bolusyonaryong kahublagan kag ang katawhan sang Negros nakaagum sang grabe nga klase sang atake nga ginalunsar sang mapiguson nga makinarya sang iya kaaway sa sahi, ang AFP kag PNP, paagi sa FMO kag *Retooled Community Support Program* (RC-SP) sa isla. Apang paagi sa pagpamuno sang KRPIN, ang NPA sa Negros kag rebolusyonaryong masa malaparan nga napahulag agud magbato nga organisado, syentipiko kag pursigido nga kontra-kampanya nga may kinaiya sang lain-lain nga porma sang paghimakas. Ini nagalunsar sang anihilatibo kag atritibo nga aksyon militar, nagalunsar sang lain-lain nga pyudal nga paghimakas, nagakampanya batuk sa militarisasyon kag paglapas sang tawhanon nga kinamatarung, naga-organisa sang mga tim para sa pagpalapad sang erya, kag nagapatuman sang edukasyon kag pag-organisa nga kampanya wala pa labot sa iban nga mga rebolusyonaryong hilikuton.

Ang bilog nga rebolusyonaryo nga kahublagan sa Negros mas labe nga determinado nga paslawon ang kaaway kag ang katuyuan sini nga dugmukon ang rebolusyonaryong kahublagan sa isla.

Sining tuig, ang mga naga-pamuno nga kadre sang Partido kag kumander sang NPA seryoso

nga nagtalakay sang mga mayor ukon yabe nga mga hitabo sa aton inagihan sa paglunsar sang armadong paghimakas sa kontra-rebolusyonaryo nga kampanya sang rehimen Duterte. Aton gintun-an ang mga problema sa paglunsar sang armadong pag-himakas kag paano ini solbaron agud mapasulong ang inaway banwa sa isla.

Sa idalum sang absoluto nga pagpamuno sang Partido, ang NPA nga yara sa estratehikong dispensiba gin-atubang ang estratehikong opensiba sang kaaway. Ang kaaway pila ka pilo nga mas daku kag mas mabaskog kumpara sa NPA kon intandi sa numero kag kadakuon sang pwersa, numero kag kadakuon sang iya armas, kag iban nga mabaskog nga kagamitan panggyera pareho sang kanyon, helikopter kag eroplano pang-atake, 500-libra nga bomba, eroplano pang-espiya kag mga *drone* pangtiktik kag madamu nga lohistika, pagkaon kag iban pa nga suportang serbisyo. Sa sining perspektiba, ang kaaway tuman ka superyor kag ang NPA inperyor. Masiling naton nga ini inaway sa tunga sang dalagku nga kumprador-agalon mayduta batuk sa tuman nga ginahimuslan kag ginapigos nga masa.

Apang may yara kabalis-



karan nga kundisyon. Una, ang kontrarebolusyonaryo nga gyera ang kontra-pumuluyo. Ini batuk sa interes sang malapad nga masa sang mamumugon, mangunguma kag iban pa nga ginahimuslan kag ginapigos nga sahi. Ginadampigan sini ang interes sang uno porsyento sang sosyedad nga amo ang mga dalagku nga kumprador-agalon may duta kag dalagku nga burukrata batuk sa mayoriya sang katawhan sa isla sang Negros. Sa pagkamatuod, sa ila kontra-insurhensya nga operasyon militar, ila ginahalitan ang mga mangu-nguma kag mamumugon sa kampo, kag nagalapas sa tawhanon nga kinamatarung. Indi makatarungan ang ila kontrarebolusyonaryong gyera.

Ang NPA, sa pihak nga bahin, may yara wala nagahubas nga suporta sang malapad nga masa sang mangunguma, mamumugon sa kampo, mangingisda, imol nga taga-syudad, gagmay nga propesyunal, pamatan-on kag kaba-baehan tungod ini nagasuporta kag nagadampig sa ila demokratikong kinamatarung kag interes kag nagapakig-away para sa matuod nga reporma sa duta kag nasyunal nga industriyalisasyon. Ang rebolusyonaryong gyera sang NPA ginasuportahan kag ginapakigbahinan sang pumuluyo tungod ini isa ka makatarungan nga gyera. Sa sini nga bagay, ang NPA superyor samtang ang kaaway inperyor.

Ikaduha, ang mga tropa sang reaksyunaryo nga hukbo may manubo nga moral kag motibasyon nga makig-away. Ang masa masami makabati sa kaaway nga “amon lang ginalagas ang sweldo,” ukon sa mga armadong engkwentro kag kon ang kaaway magpanawagan sang dugang nga pwersa, ang ila mag-reinpors nga yunit magsabat, “maayo kon tinapay ang kadtoan, yara kami dayon.” Ang mga reaksyunaryong soldado muklat sang lapnagon

nga korapsyon sa mataas nga opisyal militar sa mga baklanay sang gamit panggyera, uniporme, botas pangkombat, paagi sa E-CLIP kag iban pa. Muklat man sila nga ginhimo lang sila nga pangbala sang kanyon sa ila ambisyoso nga mga opisyaes nga naghandum magpataas sang ranggo. Sila muklat man sang pagka-peke sang engkwentro, pagpasurender kag pagpamatay sa mga *hors de combat*. Ginabayaran nila MGen. Arealo, BGen. Peña kag BGen. Pasaporte ang ila pagpaniplang paagi sa paghatag sang pasabornong pagpadungog kag pagdayaw sa ila mga soldado para sa “pinasahi” nga perpormans sa patag-awayan sa ila pagtinguha nga pasakaon ang moral kag pahulagon ang ila tropa para mag-away.

Ang pulitikal nga paghiusa sang tropa sang kaaway tuman kahayang ukon manabaw kag mahapos nga mabungkag samtang ang Pulang hangaway ginhiusa sa malig-on nga pulitikal nga paghiliusa, mga sakripisyo kag kabudlayan, hugot nga maki-kaupod nga relasyon sa tunga sang opisyal kag hangaway, kag may hugot nga angot sa tunga sang NPA kag sang pigos kag ginahimuslan nga masa. Sa sini nga bagay, ang NPA superyor kag ang kaaway inperyor.

Ikatatlo, bisan pa ang pasistang tropa sang kaaway (ang 302nd *Brigade*, 303rd *Brigade*, 32nd *Division Reconnaissance Company*, 33rd *Division Reconnaissance Company*, 542nd *Engineering and Construction Battalion*, 16th *Scout Ranger Company*, 33rd *Civil Military Operations Company*, *Military Intelligence Battalion*; kag 6th *Special Action Force Battalion*, 6th kag 7th *Regional Mobile Force Battalion*, kag 1st kag 2nd *Provincial Mobile Force Company* sang PNP; dugang pa ang mga CAFGU) mas daku sa nu-

mero, apang ang kalaparon sang kadutaan sa isla sang Negros malapad pa para sa NPA agud maka-maniobra. Ang kaumhan relatibo nga malapad kag mayoriya sang pumuluyo sa Negros, ang mangunguma kag mamumugon sa kampo, nga nagapuyo diri hugot nga nagasuporta sa pakig-away sang NPA. Sa sini, ang NPA superyor samtang ang kaaway inperyor.

Gani, ang superyoridad sang kaaway indi absoluto. May yara ini kahuyangan nga mahimo nga mangin inperyor ini sa NPA. Subongman ang NPA indi absoluto nga inperyor sa kaaway. May yara ini kabaskugan nga nagahimo ini nga superyor batuk sa kaaway. Gani indi na makwestyon nga ang NPA mas nga superyor sang sa kaaway sa bahin sang suporta sang malapad nga masa. Sa estratehiya, ang kaaway superyor, apang, sa taktika, may madamu ini sang kahuyangan nga pwede mabentahaan sang NPA sa paglunsar sang atake nga pat-ud nga magdaug.

Sa nagligad nga 12 ka bulan, aton gin-atubang ang kaaway paagi sa madamu nga atritibong aksyon militar kag pila ka anihilatibo nga taktikal nga opensiba nga nagagamit sang superyor nga pwersa batuk sa mga mahayang nga yunit sang kaaway. Ang prenteng gerilya sa idalum sang Apolinario Gatmaitan Command nakalunsar sang 44 ka opensibang militar kag aksyon pagsilot kon sa diin isa ka platun sang tropa sang kaaway ang napatay sa patag awayan kag isa ka platun ang napilasan.

Aton ginakumbina ang aton kontra-ensirkulo nga kampanya sa mga ideolohikal kag pulitikal nga edukasyon kag mga aktibidad para sa aton mga Pulang kumander kag hangaway. Samtang gina-away naton ang kaaway, aton man ginapataas kag ginapatalum ang aton ideolohi-

kal kag pulitikal nga mga hinganiban sang Partido, sa NPA kag rebolusyonaryong pwersa.

Sa dalagan sa pagpakig-sumpong sa kaaway, kita man nagalunsar sang kontra-pyudal nga paghimakas agud makakuha sang minimum nga programa sa repormang agraryo sa pagpaubos sa arkila sa duta, pagdula sang usura, pagpasaka sa sweldo sa uma, pagpasaka sa presyo sang baklanay sang produkto sang mga mangunguma kag pagpa-uswag sang agrikultural nga produksyon kag trabaho para sa dugang nga kita. Kita man nagalunsar sang mga kampanyang masa agud hanason ang pumuluyo sa pagdepensa sa kaugalingon, pauswagon ang pampubliko nga ikaayong lawas kag katinlo, pataason ang ila edukasyon kag kultural nga lebel kag magpauswag sang simple nga kooperasyon kag produksyon.

Tungod ang Partido hayagan nga nagapahayag sang iya determinasyon kag militante nga pamatukan ang lapnagon nga mga FMO sang kaaway agud dampigan ang kinamatarung kag interes sang pumuluyo kag hatagan sang hustisya ang tanan nga biktima sang terorismo sang estado, ang masa nagsabat paagi sa signipikante nga suporta para sa kinahanglanon sang mga yunit sang NPA kag madamu ang naganyat nga magpasakup sa lubos nga panahon sa NPA. Ang masa mainit nga naga-amot sang bugas, pagkaon kag iban pa nga suplay para sa ila matuod nga hangaway. Kon maglunsar sang mga taktikal nga opensiba, ang iban ginapahulag agud magluto sang pagkaon para sa mga yunit sang NPA kag ang iban ginatahasan nga magbantay sa hulag sang kaaway.

Ang mga kadalag-an sang NPA magpataas sa kapagsik sang masa. Nagakalang kag sila sa pagtukod sang ila organisasyon

masa kag sa sini diri magtuhaw ang mga organo sa gahum pampulitika kag mga lokal nga sanga kag grupo sang Partido. Bisan pa sa pagpaninguha sang mga reaksyunaryo nga pwersa nga utdon ang angot sang pumuluyo sa NPA kag sa Partido nagapamuno sini, aton nga napabilin ang hugot nga naka-ugat sa masa. Bisan pa, sa aton pag-atubang sa mabaskug kag sustinido nga mga atake sang kaaway, sa pangkabilugan nahimo sa gihapon naton nga magkonsolida kag magpalapad sa aton baseng masa.

Sa pangkabug-osan, ang sistematiko nga pag-atubang sa armadong kampanya sa pagpang-ipit sang kaaway brektu nga hilikuton para sa Rehiyon kag mga prenteng gerilya. Aton hugot nga hakson ang pagkamalahalon sang mga pagtulunan gikan sa aton rebolusyonaryo nga inagihan kag padayon nga pauswagon ang lain-lain nga patag sang armadong paghimakas, rebolusyon agraryo kag pagtukod sang baseng masa agud mapasulong ang aton pagtinguha nga paslawon ang lapnagon kag sustinido nga atake sang kaaway.

Samtang pursigido kag militante nga ginalunsar naton ang armadong pakig-away, aton man ginagamit ang nagahiliugyon nga prente bilang hinganiban sa paglutos sa subong nga rehimen Marcos. Ang kagarukon sang mala-kolonyal kag mala-pyudal nga nagahari nga sistema nga makita sa pagbalik sang mga Marcos nagbukas sang ganhaan sa pagtukod sang bag-o kag pagpalapad sang subong nga mga alyansa. Sa idalum sang pagpamuno sang sahing mamumugon, dapat naton mas pa nga pauswagon ang sandigan nga alyansa sang mamumugon kag



mangunguma, ang progresibong alyansa sang masang anakbalhas kag sang peti-burgesya sa syudad, kag ang patriyotikong alyansa sang progresibong pwersa kag nagabag-o-bag-o nga punsodnon nga burgesya, kag ang malapad nga nagahiliugyon nga prente sang patriyotiko kag reaksyunaryo nga pwersa nga mga temporaryo kag indi istable nga alyado batuk sa pinakamalain nga reaksyunaryo nga pwersa, nga sa subong nga panahon amo ang Marcos-Duterte nga hubon.

Ang pwersa sang estado wala lang nagalunsar sang lubos nga inaway sa kaumhan kundi subongman sa kasyudaran. Luyag sini nga pahupaon ang ligal nga demokratikong kahublagan masa nga nagawaragwag sang kontra-imperyalista, kontra-pyudal kag kontra-pasista nga panawagan sang pumuluyo kag nagabuyagyag sang kontra-pumuluyo, pagka bangkarote sa moralidad, kag pagpangawat gamit ang poder sang US-Marcos II nga rehimen. Sa Negros, partikular nga ginatarget ang mga lider mangunguma kag organisador nga nagadala sang kontra-pyudal kag kontra-pasista nga paghi-

makas gikan sa kaumhan pakadto sa kasyudaran kag sa mata sang publiko.

Bisan wala pa niya nabuhian ang iya bug-os nga ikasarang, ang nakabase sa syudad nga ligal nga kahublagan masa sa isla sang nagligad nga tuig nagpukaw, nag-organisa kag nagmobilisa sa mga mamumugon, imol nga taga-syudad, pamatanon kag estudyante, mga drayber, mangingisda, mga propesyunal, tawong simbahan, environmentalist, kag iban pa nga sektor sa mga kampanya sa pagpasaka sang sweldo kag mga benepisyo, tapuson ang kontraktwalisasyon, tapnaon ang pagsaka sang presyo sang langis kag ibasura ang pagdula sang jeepney, pauntaton ang *land use*

conversion kag reklamasyon, pag-untat sa importasyon sang kalamay kag iban pa nga *neoliberal* nga mga polisiya, kag tapuson na ang paglapas sang tawhanon nga kinamatarung kag pagdemanda sang hustisya para sa tanan nga biktima sang kakugmat sang estado.

Ang ligal nga demokratikong kahublagan nagaduon sa pagkademonyo sang nagaharing sistema kag naga-engganyo sa pumuluyo nga makig-away batuk sa reaksyunaryo nga rehimen. Apang, ang iya porma sang paghimakas indi makabag-o sa pundamental nga kinaiya sang mapiguson kag mahimuslanon nga nagahari nga sistema. Indi maka-sustini batuk sa naga-padayon nga pasistang pag-

pang-atake nga ginahimo sang AFP kag PNP kon indi ini magtukod sang madalum, maligon kag malapad nga likom nga ubod. Dugang pa, mahimo ini nga mahulog sa tuo nga oportunismo kag repormismo kon wala ini ginapamunuan sang Partido.

Ang Partido sa Negros madalum nga naka-ugat sa masang mamumugon kag mangunguma. Mayoriya sang iya kadre kag katapu sang Partido naghimo sang rebolusyonaryong hilikuton sa kaumhan samtang may yara man sa mga lokalidad, kag likom kag ligal nga masang organisasyon. Naga-rekrut ini sang katapuan gikan sa pinakamilitante nga Pulang hangaway kag abante nga masang aktibistang mamumugon, mangunguma, kababahan, pamatanon kag propesyunal nga nasugbohan na sa paghimakas masa. Ginakumbina sini ang mga edaran, nahanunga nga edad kag pamatanon nga kadre sang Partido sa rebolusyonaryong hilikuton agud mapabakud ang pagpamuno sang Partido sa tanan nga lebel kag pauswagon kag hanason ang mga kadre nga may ikasarang nga maghikot sa malapad nga sakup sang rebolusyonaryong hilikuton.



III. Solbaron ang aton subong mga problema agud masulong ang inaway banwa sa isla

ANG MGA KADRE KAG KATAPU sang Partido, Pulang kumander kag hangaway kag ang rebolusyonaryong pwersa kag alyado sa Negros dapat determinado kag militante nga pamatukan ang malain kag kontrarebolusyonaryo apang wala sang pulos nga plano sang mga alipures sang reaksyunaryo nga rehimen sa pagwasak

sang NPA sa Negros kag pwersahon ang bug-os nga rebolusyonaryong kahublagan nga magsurender. Kaangot kag kabahin sang inaway banwa sa pungsod, aton dapat hakson, tun-an kag solbaron ang bag-o nga mga problema sang aton partikular nga inaway banwa sa isla sang Negros base sa partikular nga

mga bag-o nga sirkumstansya nga nagtuhaw upod sa nagaluntad nga kahimtangan. Dapat naton hinumdumon nga ang mga problema sa inaway mahimo nga magsalimuot kag magdaku samtang nagasulong ang inaway.

Natukod gikan sa kontra-rebolusyonaryo nga gyera ni Duterte, ang subong nga pasista kag

kawatan nga rehimen nagapanawagan sang “pagpasingki sa pagpang-atake sa operasyon” ukon “pagpataas sa kabaskugon sang mga operasyon” nga buot silingon mas masingki kag mapintas nga lapnagon nga pagpang-atake sa mga prenteng gerilya kag sonang gerilya sang NPA sumugod sa ikaduha nga bahin sang tuig 2022 hasta sa una nga bahin sang tuig 2023 sa konteksto sa pagwasak sang rebolusyonaryong pwersa sa Negros sa una nga duha ka tuig ni Marcos Jr. Iya ginasistematisa ang iya pungsodnon nga pangsulod nga plano pangseguridad kag kontra-insurhensya nga kampanya, kag ginpataas ang iya ikasarang paagi sa mga bag-o kag *high-tech* nga kagamitan pang-gyera. Subongman, iya ginatabunan ang mga impormasyon sa mga madinalagon nga taktikal nga opensiba sang NPA agud mamentina ang ginapahayag nga “nawasak na” kag “napahuyang na” ang rebolusyonaryo nga pwersa sa isla.

Isa ini ka hangkat kag oportunidad para sa NPA sa Negros nga ang Partido yara sa unahan agud sakmiton ang inisyatiba kag mag-angkon sang asud-asud nga dalagku kag ginagmay nga kadalag-an batuk sa nagaoperasyon nga tropa sang kaaway paagi sa politiko-militar nga pagpakig-away. Dapat kita tanan mag-padayon kag atubangon ang subong nga mga panghangkat agud mag-angkon sang dalagku nga kadalag-an sa demokratikong rebolusyon sang katawhan.

Dapat naton i-aplikar ang Marxismo-Leninismo-Maoismo bilang matalum nga hinganiban sa pag-atubang sa masingki kag makasiligni nga atake sang mapintas nga kaaway. Subongman, aton balansehon ang disiplina kag kahilwayan, sa tunga sang paghiusa sang pagkapursigido kag lubos nga paghampang sang inisyatiba sa pagpakig-away sa kaaway sa

paagi sa pagtuman sang prinsipyo sang demokratikong sentralismo.

Sa subong daku nga panghangkat nga mapangibabawan ang makitid nga panghunahuna, empirisista kag mekanikal nga mga pamaagi sa pagtuon sang mga problema sa aton inaway banwa sa isla. Masami mabudlay nga hakson ang masalimuot nga obhetibong kahimtangan. Sa pungsodnon nga lebel, kita natudluan na kag pamilyar na sa prinsipyo sang operasyon kag gerilyang taktika agud mapasulong ang aton inaway banwa. Apang, samtang nagasulong ang inaway, madamu nga mga problema ang padayon nga nagatuhaw. Ang daan nga problema masolbar kag mabuslan sang bag-o. Apang kon ang daan nga mga problema nagpabilin nga wala masolbar, masapawan naman ini sang mga bag-o kag lain-lain nga problema ang magasinampaw kag mahimo nga mangin masalimuot nga hambalanon, kag ang inaway mangin komplikado man samtang nagalakat ang panahon.

Apang kon aton isahon ang aton kolektibo nga pagtinguha kag magpakuripot sang aton agtang agud maghimo sang kumplikado nga pagpanalawsaw kag masangkad nga pag-analisa, pwede naton matadlong ang mekanikal kag empirisista nga pamaagi sang pagtuon kag pagsolbar sang mga problema. Sa sini pwede na naton matinugahon nga mapasulong ang aton inaway banwa.

Aton hinumdumon nga ang mga sirkumstansya, bisan ano pa ka budlay kag kasalimuot, naghapag sang bag-o nga oportunidad kag nagabukas sang aton mga mata sa kamatuoran nga wala



pa naton mahangpan. Dugang ini nga panghangkat kon paano naton lab-uton ang oportunidad kag matransporma sa mas mataas nga halintang ang mga kamatuoran nga aton nahangpan agud solbaron ang dalagku nga mga problema nga gina-atubang naton.

Dugang pa, ang ideolohikal kag pulitikal nga paghiusa sang mga kadre kag katapu sang Partido, ang bug-os nga pwersa sang NPA kag rebolusyonaryong masa amo ang yabe agud muklat kag hugot nga hakson ang panawagan sang Sentral nga liderato sang Partido kag pursigido nga lab-uton ang mga kadalag-an samtang nagasulong sang inaway banwa sa matinugahon nga pamaagi. Dapat segurohon sang mga organo sang Partido nga ang NPA kag rebolusyonaryong masa sa ila matag erya nga nagahilusa sa katuyuan, direksyon, kag panawagan nga magpamatuk lakip na sa mga mainit nga isyu nga nagapalala sa kahimtangan sang masang mangunguma kag iban pa nga ginapigos nga sahi.

Kinahanglan nga paslawon ang nagasingki kag nagapintas nga kontrarebolusyonaryo nga gyera

sang nagahari nga reaksyunaryo nga rehimen.

Ang aton manggaranon nga inagihan sa inaway banwa nagapamatuod nga ang estratehikong dependensya sa pangkabilugan pwede nga matransporma sa taktikal nga opensiba paagi sa pagpakig-away gerilya. Ang kumbinasyon sang paborable nga pisikal kag sosyal nga tereyn sa isla sang Negros amu ang pinakamaayo para sa gagmay kag mahuyang nga mga yunit gerilya sang NPA agud masustini ang paglunsar sang gerilyang pakig-away nga pat-ud nga magdaug kag padayon nga maglapad kag magbaskog ang NPA. Ang iban nga yunit sang NPA dapat pangibabawan ang pagpabilin sa konsolidado apang limitado nga espasyo kag napabayaang ang malapad nga erya nga wala pa naton nalab-ot. Ang oportunidad para sa malapad nga espasyo pwede magamit sang maayo sang NPA sa mapangahason kag gilayon nga paglapad kag konsolidasyon sa mga prenteng gerilya nga labaw sa ikasarang sang kaaway nga lab-uton base sa politiko-militar nga linya sang lapnagon kag dasok nga inaway gerilya sa nagalapad kag nagadalum nga baseng masa sa halintang sang estratehikong dependensya.

Apang, nagakuntento na lang kita sa lebel nga aton nalab-ot. Mabaskog ang tendensya nga wala naton seryoso nga ginatunan ang sirkumstansya kag ginapakanubo ang kaaway. Nahalugan naton ang paghakos sang aton mga kahuyangan—ang NPA gamay kag huyang nga pwersa samtang ang kaaway sa gihapon daku kag mabaskog, kag sa malawig nga panahon, nagpabilin kita sa estratehikong dependensya samtang ang kaaway yara sa estratehikong opensiba. Samtang kita nagapakig-away batok sa konserbatismo militar, ang makasilig ni nga kaaway nagapataas sang

kasingkion kag kapintas sang lapnagon nga pagpang-atake. Amu ini ang mga kasaypanan nga dapat naton pangibabawan.

Gani, dapat ang aton utok indi magpabilin sa isa lang ka lebel tungod ang mga butang kag mga proseso sa aton partikular nga rebolusyonaryong gyera wala nagapundo kundi padayon nga nagabag-o. Dapat naton hangpon, tun-an kag solbaron ang mga partikular nga problema sa aton inaway banwa sa isla sang Negros base sa mga partikular nga sirkumstansya nga ginaluntaran naton subong.

Sa mga FMO kag RCSP sang kaaway, may madamu nga target para sa mga taktikal nga opensiba. Pwede naton tun-an kag puntong ang mga mahuyang nga bahin sang kaaway. Ang kabaskogan kag kahuyangan magkabangga nga aspeto sang butang. Ang mabaskog nga kolum sang kaaway pwede nga mangin mahuyang pagkatapos sang pipila ka inadlaw nga operasyon. Sa pangkabug-osang, ang mga opensiba sang kaaway pagkatapos nga maka-atubang sang madamu nga kabudlayan, kakapoy kag kagutom pagkatapos sang sinema nga operasyon matransporma sa dependensyang postura. Ang mga soldado luyag na nga magpahuway kag indi na luyag makig-away pa. Amu ini ang oportunidad nga ang pagka-dependensya sang NPA matransporma sa kontra-opensiba kag makalunsar sang anihilatibo nga atake batok sa mahuyang nga bahin sang kaaway. Aplikable ini bisan pa sa “rigodon” nga taktika sang kaaway kon diin ginabulos-bulos nila ang ila tropa para pakapuyan ang NPA. Tungod sa tuman ka mahulag kag madasig ang progreso sang inaway, ang mga kumander sang NPA dapat mangin matalum sa pag-oberbar kag pagtuon. Dapat kita padayon nga magtuon kon paano husto nga gamiton ang

superyor nga pwersa sang NPA nga seguridad nga makabira sa mahuyang nga bahin sang kaaway. Sa kaso sang lusob nga taktika (pareho sa reyde), kon ang konsentradong tropa sang NPA maglunsar sang surpresa nga atake batok sa magamay kag kapoy nga tropa sang kaaway, pwede niya mapapas ang kaaway kag pat-ud nga magdaug. Ang mga yunit sang NPA dapat mapangahason, militanteng kag determinado nga sumpong ang kaaway kag magdaug.

Sa aton anihilatibong taktikal nga opensiba, dapat naton sampaton nga gamiton ang konsentradong tropa sang NPA batok sa mahuyang nga bahin sang kaaway. Ang aton atritibo nga aksyon militar indi epektibo nga nakumbina sa aton mga anihilatibo nga aksyon militar. Dapat kita maghanas sang mga Pulang hangaway kag magpa-uswag sa paggamit sang gagmay nga tim sang NPA agud pahuyangon ukon idemoralisa ang daku nga kolum sang kaaway bilang paghanda para sa anihilatibong bira sang mayor nga yunit sang NPA batok sa mahuyang nga kolum sang kaaway. Seryoso nga halit sa moral sang tinawo sang kaaway kag sa ila materyal nga resorsa ang malaparan kag masunson nga mga atritibong operasyon kangay sang pagbutang sang *command-detonated* nga eksplosibo sa alagyan sang yunit sang kaaway, pag-isnayp sa ila, paglusob sa ila paagi sa paghaway sang granada; kag pagatake sang linya sang suplay kag transportasyon sang kaaway makatuga. Aton man birahon sang aton pangilot nga aksyon ang mga bat-ulan nga kontrarebolusyonaryo nga may mga utang nga dugo sa pumuluyo.

Ang aton katuyuan amu ang matransporma ang atrisyon pakadto sa anihilasyon kag maseguro ang kadalagan. Sa sini nga bagay,

dapat man kita mangin mabinantayon sa kabaliskaran—pag-transporma sang anihilatibo nga taktikal nga opensiba pakadto sa atritibong aksyon. Aton ginahatagan sang prayoridad ang pag-agaw kag pagtipon sang signipikante nga numero sang armas kag bala gikan sa kaaway agud magtukod sang mga bag-o nga yunit sang NPA kag mga prenteng gerilya.

Sining tuig, samtang nagatubang kita sang malaparan kag masingki nga atake sang kaaway, dapat kita magtinguha nga pauswagon ang eksperyensiya sang NPA sa pag-away sang pasistang kaaway; pauswagon ang ikasarang sa kumand kag koordinasyon, paniktik, pagplano kag operasyon, sa taktika kag teknika; kag mas pa nga pauswagon ang ikasarang sa pag-away sang mga yunit gerilya sang NPA. Dapat kita magtinguha nga agawon ang inisyatiba kag pangibabawan ang pasibidad batuk sa masingki kag masalimuot nga atake sang kaaway. Sa pangkabilugan, dapat kita maghimakas batuk sa nagaluntad nga agos sang konserbatismo militar sang mga yunit sang NPA sa Negros kag sa mga prenteng gerilya.

Dapat naton hugot nga pa-taason ang pulitikal nga kamuk-

latan, kaisog kag kumpyansa sang mga Pulang kumander kag hangaway. Ang mga Pulang kumander dapat magtuon nga magpakuripot sang ila agtang agud huluhalang kag sa matutom nga paagi husto nga matun-an kag masolbar ang mga problema sa aton inaway banwa. Kon aton matalum nga ma-obsorbahan ang nagaluntad nga kundisyon kag sitwasyon, kon ang utok naton nagasanto ukon may malapit nga pagbana-bana sa obhetibong kundisyon, makahimo kita sang naga-kaigo nga resolusyon para masolbar ang mga nagaluntad nga problema. Dapat naton papagsikon ang pagpang-rekrut sang NPA kag paghanas sa pulitiko-militar para mapataas ang ikasarang sa inaway sang aton Pulang hangaway.

Ang mapagsik kag madinalag-on nga mga taktikal nga opensiba sang NPA nagahatag sang inspirasyon sa pumuluyo sang Negros kag dugang pa nga magganyat sa ila agud mag-suporta kag direkta nga makigbahin sa pagpasulong sang rebolusyonaryong armadong paghimakas. Magahatag man ini sang inspirasyon kag makaganyat man sa mga mamumugon, mangu-nguma, mamumugon sa kampo, imol nga taga-syudad, mga jeep-

ney driver, mangingisda, kag peti-burgesya sa syudad agud maglunsar sang lain-lain nga porma sang paghimakas para masulong ang ila pang-ekonomiya kag demokratiko nga mga demanda batuk sa pagpanghimulos kag pagpamigos sang reaksyunaryo nga nagahari nga sahi sang dalagku negosyante-komprador, dalagku nga agalon mayduta-haciendero kag burukrata militar sa isla.

Sa tunga sang nagalubha nga krisis sang mala-kolonyal kag mala-pyudal nga nagahari nga sistema, tuman ka kinahanglanon nga malaparan nga mapukaw, ma-organisa kag mapahulag ang pumuluyo sa ila pang-ekonomiya kag pulitika nga kahublagan subay sa pungsodnon demokratikong linya agud mapasulong ang ila makasahi, sektoral kag pungsodnon nga demanda. Dapat man naton patalumon ang aton paghakos sang mapiguson kag mahimuslanon nga kundisyon nga ginaantus sang pumuluyo paagi sa permi paghimo sang sosyal nga pagpanalawsaw. Nagatuon kita halin sa masa sang husto nga porma, taktika kag pamaagi sa pagpukaw, pagorganisa kag pagpahulag sa pumuluyo sa madamuan nga isip. Dapat naton ipaseguro ang pulitikal nga edukasyon sang mga lider kag masang aktibista, kag malaparan nga mapalapnag ang pungsodnon demokratikong propaganda sa tanan nga kampanyang masa.

Ang mga nakabase sa urban nga masang organisasyon sang mga mamumugon, imol nga taga-syudad, pamatan-on nga estudyante, manubo sang kita nga mga propesyunal kag intelektwal kag iban pa nga demokratikong sektor dapat mapalapad kag mapalig-on paagi sa matutom nga pag-



trabaho. Ang mga mobilisasyon masa kag kampanyang masa indi lamang “sweeping”. Pamaagi man ini agud mapakita ang subong nga kusog sang organisasyon masa subongman pamaagi agud mag-engganyo sang madamu nga katapuan.

Ang demanda para sa pagpasaka sang sweldo kag mga benepisyo base sa makabuhi nga sweldo (*family living wage*) para sa mamumugon, mamumugon sa kampo, mala-proletaryado, kag mangunguma (ang imol nga mangunguma kag manubo kag nahanunga nga saray sang nahanunga nga mangunguma nangin mamumugon sa kampo pulu-pannahon) dapat hatagan sang prayoridad sining tuig sa tunga sang wala untat nga pagsaka sang presyo sang langis kag mga balaklon. Dapat man hugot nga pamatukan ang lapnagon nga pagpang-agaw sang duta sa idalum sa islogan sang kauswagan sa bug-os nga isla paagi sa konbersyon sa gamit sang kadutaan kag mga proyektong reklamasyon tungod ini makawasak sang puluy-an kag pangabuhian sang mga mangunguma, mangingisda, imol nga taga-syudad kag manubo nga nahanunga nga sahi; maka-apekto sa pagprodyuser sang pagkaon; kag makawasak sang palibot. Dapat man naton kabigon ang mga tawong simbahan, akademya, politiko, abogado kag iban pa nga sektor batuk sa bira sang imperyalistang *neoliberal* nga opensiba kag ang subong nga kawatan nga rehimen.

Dapat dugang nga palaparon ang pagpamatuk sa lapnagon nga militarisasyon sa kaumhan kag madata nga paglapas sang tawhanon nga kinamatarung sa bug-os nga Negros, ang mga kontra-pasista nga mga panawagan dapat makaabot sa publiko kag internasyunal nga komunidad. Kaupod sang ila matuod nga hukbo nga nagapakig-away para sa ila, ang masa nga ginapamunuan sang ila masang organisasyon dapat mag-organisa sang ila kaugalingon kag maglunsar sang kontra-pasista nga kampanya agud palayason ang FMO kag RCSP sa ila mga komunidad. Ang mga makasaligni nga krimen nga ginhimo ilabi na batuk sa mga mangunguma, kababaehan kag kabataan sa masingki kag mapintas nga armadong kampanya sang pagpang-ipit sang AFP kag PNP sa Negros dapat lapnagon nga mabuyagyag kag mapamatukan. Ini maga-amot sa panawagan nga untaton na ang *de facto martial law* sa isla nga naglala sugod sang *Memorandum Order 32* kag NTF-ELCAC.


Ang pinakabarbaro nga paglapas sa tawhanon nga kinamatarung ginsabwag sang dalagku nga kumprador-haciendero-agalon mayduta agud matapna ang patay-buhi nga paghimakas sang mga Negrosanon nga mangunguma kag mamumugon sa uma batuk sa pyudal kag mala-pyudal nga pagpamigos kag pagpanghimulos sa isa ka *monocrop* nga ekonomiya sa kalamay. Gani, ang kontra-pasista nga paghimakas

dapat maangot kag mapasaka sa kontra-pyudal kag kontra-imperyalista nga linya.

Ang Partido sa Negros dapat padayon nga magpalig-on sang iya kaugalingon agud epektibo nga mapamunuan ang demokratikong rebolusyon sang katawhan sa isla. Samtang ginapatuman naton ang aton rebolusyonaryong buluhaton agud matuman naton ang aton mga plano sining tuig nga madinalag-on, dapat naton palaparon ang aton kubay nga muklat nga indi makapasulod bisan isa lang nga indi masaligan. Dapat man magdeploy sang mga kadre kag katapu sang Partido gikan sa syudad pakadto sa kaumhan para sa inaway banwa. Ang mga rebolusyonaryong aktibista dapat may nadihon nga programa para sa ila agud makapakigbahin sila sa rebolusyonaryong hilikuton ilabi na sa armadong paghimakas.

Samtang ginapasingki naton ang armadong paghimakas sa isla dululungan sa mapagsik nga hayag nga kahublagaan masa, ang rebolusyonaryong pwersa sang Partido, NPA kag mga organo sang gahum pampulitika mapalig-on subong man ang nagahiliugyon nga prente batuk sa US-Marcos II nga rehimen. Sa amo sini, mabutang kita sa pinaka-paborable nga pusisyon para maka-amot sa pungsodnon nga pagsulong sa demokratiko nga rebolusyon sang katawhan tubtob sa bug-os nga kadalagan. **AP**





**LONG
LIVE
THE
CPP**



Serve The Revolution
Serve The People
#CPP54

